

# Mula cari kerja 6 bulan sebelum dapat ijazah



**TIDAK TUNGGU LAMA:** Cik Elenna Mohamed Amin tidak menunggu sehingga selepas konvokesyen untuk mencari pekerjaan. Siswazah SMU ini kini merupakan penganalisis harga di ExxonMobil meskipun konvokesyen baru berakhir beberapa minggu lepas. – Foto SMU

ENAM bulan sebelum tamat pengajiannya di Universiti Pengurusan Singapura (SMU), Cik Elenna Mohamed Amin telah pun mula mencari kerja.

Malah, beliau telah pun menghadiri sesi temu duga sekitar setahun yang lalu iaitu pada bulan Jun.

Meskipun baru sahaja dapat menggarang ijazah Sarjana Muda berganda *Magna Cum Laude* dalam Pengurusan Perniagaan dengan pengkhususan dalam pemasaran dan Sains Sosial dengan pengkhususan dalam psikologi, Jumaat lalu, Cik Elenna, 25 tahun, telah mula bekerja pada Februari tahun ini.

*Magna Cum Laude* merupakan kepujian tinggi (*high distinction*) yang diamugerahkan kepada siswazah yang meraih gred purata mata antara 3.6 dengan 3.79.

Beliau yang namanya diletakkan dalam Senarai Dekan semasa tahun kedua di SMU kerana keputusan akademik yang baik mula bekerja di sebuah syarikat berbilang negara – ExxonMobil – sebagai seorang penganalisis harga pada Februari tahun ini, empat bulan sebelum majlis konvokesyennya.

Anak bongsu empat beradik itu ditugaskan mengendalikan pasaran syarikat itu di Indonesia.

“Mungkin ada yang gerun mahu bertanyakan soalan terutama apabila rakan sekerja anda merupakan mereka yang berbilang kaum, bangsa dan kerakyatan. Tetapi alhamdulillah, latihan yang saya terima di SMU telah mempersiapkan saya dengan kemahiran yang diperlukan bagi alam pekerjaan.”

– Cik Elenna Mohamed Amin.

“Saya memang mempunyai keinginan bekerja dengan syarikat berbilang bangsa kerana mahu pengalaman bekerja yang bersifat global.

“Persekitarannya berbeza dan unik. Saya rasa kesannya lebih mendalam,” kongsinya.

Beliau yang juga merupakan antara pemegang biasiswa Lee Kong Chian berkata pengajian di SMU telah memberinya lebih banyak peluang bertutur dan mengetengahkan ideanya dengan lebih jelas dan yakin.

“Mungkin ada yang gerun mahu bertanyakan soalan terutama apabila rakan sekerja anda merupakan mereka yang berbilang kaum, bangsa dan kerakyatan.

“Tetapi alhamdulillah, latihan yang saya terima di SMU telah mempersiapkan saya dengan kemahiran yang diperlukan bagi alam pekerjaan,” tambahnya.

Cik Elenna menasihatkan mahasiswa yang bakal menamatkan pengajian tahun depan agar bermula awal mencari pekerjaan, sebaik-baiknya enam bulan sebelum majlis konvokesyen.

“Selain itu, saya amat syorkan penuntut universiti agar menghadiri acara menjalin rangkaian yang dianjurkan institusi agar dapat mengetahui apakah antara peluang pekerjaan yang sedia ada,” katanya lagi.